

# АКАФИСТ ВСЕМ СВЯТЫМ, ОТ ВЕКА БОГУ БЛАГОУГОДИВШИМ

## Кондак 1

Избранным угодником Божиим, всем святым, от века во всем мире просиявшим и на небеси венцы славы приявшим, похвальное приносим пение. Вы же, яко имущии велие дерзновение ко Господу, от всяких нас бед свободите, да зовем вам хвалебно: Радуйтесь, вси святии, теплии о всем мире Богу молитвенницы.

## Икос 1

Ангельский собор, умаленный падением гордых ангел и вами, всеми святыми, восполняемый, светло торжествует в день памяти вашей, и всю вселенную созывает на веселие духовное. Мы же, им подражающе, зовем вам радостно: Радуйтесь, святии, от века Богом предуведеннии и предуставленнии к славе небесней; Радуйтесь, от всех родов, мест и времен в служение Господу избраннии. Радуйтесь, избрание ваше подвигами благочестия оправдавшии; Радуйтесь, образом добрых дел ваших правый путь к небеси нам показавшии. Радуйтесь, прежде писаннаго закона Божия по закону совести праведно пожившии; Радуйтесь, в законней сени благочестно житие свое совершившии. Радуйтесь, в новей благодати светло добродетельми просиявшии; Радуйтесь, в последняя сия времена Богу благоугодившии и мзду с первыми получившии. Радуйтесь, от земных скорбей прешедшии к небесному покою; Радуйтесь, сподобльшиися зрети неисповедимую славу Божию. Радуйтесь, с лики безплотных непрестанно хвалящии Пресвятую Троицу; Радуйтесь, всегда молящиися Ей о всех почитающих вас. Радуйтесь, вси святии, теплии о всем мире Богу молитвенницы.

## Кондак 2

Видящи Православная Христова Церковь, многочисленными лики святых, яко прекрасными райскими цветы себе украшену, светло почитает память их и Пречистую Богоматерь с Рождшимся от Нея Христом Богом величает, вопиющи Тому хвалебную песнь: Аллилуиа.

## Икос 2

Разуму нашему просвещение у Господа испросите, святии угодницы Божии, да отрясше земное пристрастие, вознесемся сердцем и мыслию в наследованная вами и нам обещанная селения райская, и возопием вам радостно: Радуйтесь, ветхозаветнии праотцы и патриарси, родоначальницы по плоти Христа Сына Божия; Радуйтесь, яко благословением Божиим умножишася

роды ваша, яко звезды небесныя. Радуйтесь, среди мрака древняго нечестия правую вашу веру во истиннаго Бога сохранивши; Радуйтесь, с надеждою чаявшии обетованнаго Искупителя. Радуйтесь, яко от вашего племени возсия пресветлая свеча — Богородица Мария; Радуйтесь, яко от Нея родися Победитель смерти и ада. Радуйтесь, верою во грядущаго Христа спасение улучившии; Радуйтесь, вместо древния клятвы благословение тем получившии. Радуйтесь, и во аде Христова пришествия ожидавшии; Радуйтесь, адских мучений Им избавленнии. Радуйтесь, на небеса со славою возведеннии; Радуйтесь, с лики ангельскими в вечныя обители Отца Небеснаго вселеннии. Радуйтесь, вси святии, теплии о всем мире Богу молитвенницы.

### **Кондак 3**

Силою Вышняго осенени бывше, святии, дерзновенно ополчитесь противу начал и властей злобы поднебесныя, и победивше тех коварства, вся благая начинания ваша добре совершите, воспевающе всесильному человеколюбцу Богу: Аллилуиа.

### **Икос 3**

Имуще святии пророцы преславная селения во обителех дому Отца Небеснаго и присносущным светом лица Божия просвещаемы, неизреченнаго воистину со всеми святыми наслаждаетесь блаженства, егоже мы земнии причастницы быти желаяуще, воспеваем вам сице: Радуйтесь, святии пророцы, Богом избраннии прежде вашего рождения; Радуйтесь, верно поработавшии Ему прежде Христова воплощения. Радуйтесь, от младенчества благодатию Святаго Духа освященнии; Радуйтесь, посланнии от Господа вразумляти заблуждшия сыны Израилевы. Радуйтесь, предвозвестившии Христово от Девы славное рождение; Радуйтесь, звезды, предварившии пришествие истиннаго Солнца. Радуйтесь, законопреступных царей Израилевых дерзновенно обличившии; Радуйтесь, всякое людское нечестие мечем слова Божия нещадно посекавшии. Радуйтесь, вернии раби Господни, вся хотения Его исполнившии; Радуйтесь, истину небоязненно пред властями вещавшии. Радуйтесь, многи скорби в мире претерпевшии; Радуйтесь, со всеми избранными торжествующии на небеси в славе вечней. Радуйтесь, вси святии, теплии о всем мире Богу молитвенницы.

### **Кондак 4**

Бури житейския избавльшися, вси святии, преидосте в небесный покой, на места злачна и прохладна, идеже потоцы сладости неисповедимыя, пища славы Божия нетленная, пения и гласы празднующих; тамо убо торжествуете со всеми ангельскими силами, поюще Богу: Аллилуиа.

#### Икос 4

Око не виде и ухо не слыша, и на сердце земнаго человека не въздоша радости и сладости, ихже вы ныне наслаждаетесь, Апостоли святии. Сего ради благоговейно взываем вам: Радуйтесь, святии Апостоли, с Предтечею Иоанном ближайшии друзи Христовы; Радуйтесь, по Пресвятой Деве Марии, первостоятелие у Престола Святыя Троицы. Радуйтесь, возвестившии миру таинство нашего искупления; Радуйтесь, светом веры Христовы омраченныя люди просветившии. Радуйтесь, семя слова Божия в сердца человеческая всеявшии; Радуйтесь, плоды трудов ваших в небесном вертограде пожинающии. Радуйтесь, святии отцы, седмию вселенскими соборы исповедание православныя веры утвердившии; Радуйтесь, утишившии бурю еретическаго нечестия. Радуйтесь, изъяснившии нам догматы православныя веры; Радуйтесь, и донныне учением вашим ограждающии Церковь Христову от ересей и расколов. Радуйтесь, святии иерарси, словом и житием светло просиявшии; Радуйтесь, во свете невечернем с духовными вашими чады ныне обитающии. Радуйтесь, вси святии, теплии о все мире Богу молитвенницы.

#### Кондак 5

Боготочною, Спасе, Кровию Твоею искуплении и верно Тебе на земли послужившии вси святии, ныне на тверди церковней яко звезды пресветлыя сияют, и всех нас, по морю страстнаго сего жития плавающих, на путь правый, к небесному отечеству ведущий, наставляють; о сем убо с радостию благодарно поем Богу: Аллилуиа.

#### Икос 5

Видевши святии мученицы, яко в мире сем вся суетна суть и тлению причастна, потщастесь предвечному Богу благоугодити и претерпением лютых мук тленная на нетленная пременити, за еже сподобистесь предстояния у страшнаго Престола Владычня в славе вечней, в нейже не забудите и нас, память вашу совершающих и вопиющих вам таковая: Радуйтесь, святии стратотерпцы, кровию своею запечатлевшии правую вашу во Христа веру; Радуйтесь, не убоявшиися убивающих тело, души же не могущих убити. Радуйтесь, претерпевшии страшная мучения; Радуйтесь, явльшии на себе Христовых страстей изображения. Радуйтесь, победившии лютых мучителей свирепства; Радуйтесь, чрез огонь и воду прошедшии и в покой вечный вшедшии. Радуйтесь, исповедницы и священо-мученицы, пострадавшии за благочестие и почитание святых икон; Радуйтесь, преподобномученицы, в молитве Богу собеседовавшии и страданием диавола поправшии. Радуйтесь, за славу и честь Царя Небеснаго мужественно воинствовавшии; Радуйтесь, победную почесть от Христа на небеси приимшии. Радуйтесь, велию благодать от Господа получившии; Радуйтесь, многая и различная чудеса в славу Бо-

жию в поднебесней содеваючи. Радуйтеся, вси святии, теплии о всем мире Богу молитвенницы.

### **Кондак 6**

Проповедуют христианстии роди славу вашу, вси святии; вы бо яко рай насажденный явистеся посреде Церкви, имущии древо жизни Самаго Господа, от него же вкусивше сладости райския, вся скорогибнущая в мире сем презресте, и радостно в небесный вертоград внидосте, поюще: Аллилуиа.

### **Икос 6**

Правоверие и добродетели преподобных отец, яко солнце, всему миру сияют и нам мрачный путь жизни сея просвещают, да не заблудим в пустыни греха и душепагубных ересей. Сего ради хвалебно им воспеваем: Радуйтеся, преподобнии отцы, мир и яже в мире любви ради Божия волею оставивши; Радуйтеся, преподобнии матери, в подвизех дневных и ночных земное течение совершивши. Радуйтеся, пустынницы, в пещерах и горах со зверьми поживши; Радуйтеся, постницы, в алчбе и жажде временное житие препроводивши. Радуйтеся, столпницы, мраз и зной Царствия ради Небеснаго претерпевши; Радуйтеся, затворницы, в сердечней тишине Бога взыскавши. Радуйтеся, девственницы, целомудрие сохранивши и непорочному Агнцу Христу последовавши; Радуйтеся, послушницы, Христово смирение стяжавши. Радуйтеся, в общежитиих во взаимной братской любви ангельски поживши; Радуйтеся, мудрии и кротции монахов наставницы бывши. Радуйтеся, вси трудолюбцы, добродетелей совершенство стяжавши; Радуйтеся, в покой Господа своего вшедши. Радуйтеся, вси святии, теплии о всем мире Богу молитвенницы.

### **Кондак 7**

Хотя Всеблагий Господь явити миру, яко не всеу труждаются вси благоугождающи Ему, но яко велия мзда уготовася им в Царствии Небеснем; сего ради прослави сонмы святых угодник Своих, различне тому на земли послуживших; да и мы поревнуем тех житию, и тоя же вечныя славы чающе, поем Ему: Аллилуиа.

### **Икос 7**

“Веруай в Мя, аще и умрет жив будет”,— рече Господь. Вам же, святии вси, изрядно приличествуют сии Владычни глаголы; вы бо аще и умросте на земли плотию, но душами в вышнем селении всегда живи суще, многая и неизреченная совершаете в мире чудеса, и теплым вашим к Богу ходатайством пособствуете нам, сиче возглашающим вам: Радуйтеся горняя мудрствующим вашим умом истиннаго Бога познавши; Радуйтеся, правую вашу в Святую Троицу веру непорочно сохранивши. Радуйтеся, Христа Сына Божия,

истиннаго Бога и совершеннаго человека исповедавшии; Радуйтесь, в спасительныя Его страсти несумненно веровавшии. Радуйтесь, православием, яко звезды, блистающии; Радуйтесь, праведностию, яко финикс процветающии. Радуйтесь, плотию на земли, умом же на небеси пожившии; Радуйтесь, временную смертью на безконечную жизнь прешедшии. Радуйтесь, тесным путем евангельски шествовавшии; Радуйтесь, узкими враты Царствия Небеснаго достигшии. Радуйтесь, вечных благ наследницы; Радуйтесь, о спасении нашем теплии к Богу ходатаи. Радуйтесь, вси святии, теплии о всем мире Богу молитвенницы.

### **Кондак 8**

Страну ону горнюю, идеже вси святии по трудех земных почивают, умным очесем своим представляюще, аще и не можем постигнути сущаго тамо блаженства, мы земнии и плотию обложеннии, обаче, верую сие проразумевающе и сердцем предвкушающе, поем дивному во святых Своих Богу: Аллилуиа.

### **Икос 8**

Исчитаяй множество звезд и всем им имена нарицаая, Вседержителю Господи, Ты един веси по имени всех благоугодивших Тебе. Мы же, дело суще руку Твоею, якоже песка морскаго исчести, сие и всех святых по имени нареци не могуще, токмо изряднейшия рабы Твоя, от начала мира Тебе благоугодившия, именуем, глаголюще: Радуйтесь, Адаме и Ево, праотцы всего рода человеческого; Радуйтесь, Авеле и Сифе, первии в мире благочестия рачителие. Радуйтесь, Ное, второй рода нашего родоначальнице, и Аврааме, завета Божия приемниче; Радуйтесь, Моисее боговидче и Аароне, первый ветхозаветный священниче. Радуйтесь, Еноше и Илие, плотию смерти некусившии и на небо восхищеннии; Радуйтесь, Исаие, Давиде и Данииле, зрителие таин Бога Вседержителя. Радуйтесь, Иоакиме и Анно, родившии Деву Марию, Матерь Христа Бога нашего; Радуйтесь, Петре, Павле, Иакове и Иоанне, избраннейшии Апостоли Христовы. Радуйтесь, Николае, Василие, Григорие, Иоанне и Афанасие, непоколебимии столпи церкви Христовы; Радуйтесь, Антоние, Пахомие, Евфимие, Иларионе и Савво, великие монахов наставницы. Радуйтесь, Георгие, Димитрие, Евстратие и Пантелеимоне, велиции мученицы Христовы; Радуйтесь, Варваро, Ирино, Параскево, Екатерино и вси мученицы, кровию своею торжество веры возвеличившии. Радуйтесь, вси святии, теплии о всем мире Богу молитвенницы.

### **Кондак 9**

Вси святии Твои, Господи, ангельский подражая чин, безпрестани славят Пресвятое Имя Твое на небеси, “Свят, свят, свят”, — вопиюще; с ними же и мы грешнии на земли бренными устнами вопием: Аллилуиа.

### Икос 9

Витии суемудрыя недоумеют глаголати: како вы, вси святии, подобострастии нам бывше человецы, непреодолени страстьми бысте, мужеством вашим безплотныя враги победисте. Мы же, прославляюще укрепившаго вас Господа, хвалим доблести ваша и умиленно вопием: Радуйтесь, святии, вседушно Господа возлюбившии; Радуйтесь, любви Его ради живота своего не щадившии. Радуйтесь, мир и миродержителя победившии; Радуйтесь, вся сети древняго змия яко паучину разорившии. Радуйтесь, смирившиися под крепкую руку всеблагаго промысла Божия; Радуйтесь, покорившии волю свою воле Отца Небеснаго. Радуйтесь, прославившии Господа в душах и телесех ваших; Радуйтесь, возвеличившии Его во всех делех ваших. Радуйтесь, воздвизавшии рuce ваши на творение дел благих; Радуйтесь, направлявшии стопы ваша на путь правый. Радуйтесь, не приложившии сердец ваших к земному богатству и наслаждению; Радуйтесь, всегда помышлявшии о благах небесных и вечном веселии. Радуйтесь, вси святии, теплии о всем мире Богу молитвенницы.

### Кондак 10

Спасения путем право шествующе и о судьбах правды Божия поучающесе, вси святии, явистеся яко дрeвеса благоплодная при исходящих вод, и принесосте Богу плод добродетелей ваших во время свое. Ныне же в горнем Едеме неизреченнаго наслаждающесе блаженства, помяните и нас, чад ваших, отеческое ваше о спасении нашем попечение восхваляющих, Богу же поющих: Аллилуиа.

### Икос 10

Стена тверда нам противу лица вражия вы есте, вси святии, и теплии молитвенницы ко Христу о всем роде христианстем. Темже от стрел невидимаго борителя присно вами защищаеми, радостно взываем: Радуйтесь, рода человеческого велие украшение; Радуйтесь, в странствии земном присная нам отрада и утешение. Радуйтесь, в брани со врагами спасения нашего сильнии нам помощницы; Радуйтесь, от меча гнева Божия молитвами вашими нас защищающии. Радуйтесь, сами искушени бывше, и нам во искушениих помогающии; Радуйтесь, покаянию нас грешных зело радующиися. Радуйтесь, на различных местех земли во вся времена праведно пожившии; Радуйтесь, аще и согрешившии, обаче истинным покаянием и слезами скверну грехов омывшии. Радуйтесь, от Адама даже до днесь в надежди жизни вечныя скончавшиися; Радуйтесь, от Востока и Запада пришедшии и на лоне Авраамли почившии. Радуйтесь, яко сонм ваш новыми с земли пришельцами всегда умножается; Радуйтесь, яко вами место падших духов в соборе ангельском восполняется. Радуйтесь, вси святии, теплии о всем мире Богу молитвенницы.

### **Кондак 11**

Песни наша хвалебныя, аще бы и тмочислени были, не довлеют к прославлению добродетелей ваших, вси святии; и нам немощным удобее любити молчание; но да не явимся лениви и неблагодарни за полученныя вас ради милости и благодеяния Божия, поем прославльшему вас Владыце: Аллилуиа.

### **Икос 11**

Светильницы света не вечерняго вы есте, вси святии, у Престола Пресвятыя Троицы с ангельскими чинми в молитве о нас присногорящи, и на светлую спасения стезю наставляющии вопиющих вам сице: Радуйтесь, светильницы огня не вещественнаго; Радуйтесь, насельницы обителей Отца Небеснаго. Радуйтесь, гроздие винограда Христова; Радуйтесь, благоуханнии цвети райстии. Радуйтесь, животочнии реки, в жажде духовней нас напоющии; Радуйтесь, дожденоснии облацы, в знои искушений нас прохлаждающии. Радуйтесь, духовнии ветри, зиму уныния от сердец наших прогоняющии; Радуйтесь, сладкопесниви славии, духовную весну вечнаго блаженства нам возвещающии. Радуйтесь, мысленныя горы, к небеси нас возводящи; Радуйтесь, умнаго Солнца лучи, милость Его на нас изливающии. Радуйтесь, добрии кормчии, от потопления греховнаго нас спасающии; Радуйтесь, вернии путевождие, в небесное отечество нас путеводящи. Радуйтесь, вси святии, теплии о всем мире Богу молитвенницы.

### **Кондак 12**

Благодать, от Бога данную вам в воздаяние многих добродетелей ваших, кто от земнородных исповести возможет, о святии! Якоже бо капли морския по единой исчерпати, сице чудодействий ваших и подаваемых вами нам благодеяний несть мощно исчести. Сего ради радостно совершаем славное ваше торжество, и вся действующему в вас Господу зовем: Аллилуиа.

### **Икос 12**

Поюще Тя, Владыко Вседержителю, восхваляем вси Пресвятое Имя Твое, яко от начала мира в различная времена явил еси приснопамятныя святыя Твоя, Тебе единому в Троице славимому Богу благоугодившия, ихже молитвами от всех зол избавляеши вопиющия к ним: Радуйтесь, святии Божии угодницы с Пресвятейшею всея твари Приснодевою Марию; Радуйтесь, и вы, безплотнии ангели, хранителие рода человеческого. Радуйтесь, святии царие и князи, на земли благочестиво царствовавшии и Небесное Царствие наследившии; Радуйтесь, добрии градоправителие, в небесном граде обитати сподобльшиися. Радуйтесь, нелицеприятнии земнии судии, у небеснаго Судии оправдание и милость получившии; Радуйтесь, ревностнии словесных овец пастырие, от Пастыреначальника Христа похваленнии и прославленнии. Радуйтесь, праведнии земледелателие, в простоте сердца и незлобии Богу по-

служившии; Радуйтесь, терпеливии странницы, небеснаго отечества достигшии. Радуйтесь, юродивии, поношения и укорения Христа ради претерпевшии; Радуйтесь, безсребренницы, туне болящим исцеления подававшии и на небеси мзду приявшии. Радуйтесь, во всяком возрасте и звании угодившии Богу мужие и жены, яко вы едино есте о Господе и души ваша в руке Божией; Радуйтесь, яко в будущем веце купно с душами и телеса ваша вечная славы причастны будут. Радуйтесь, вси святии, теплии о всем мире Богу молитвенницы.

### **Кондак 13**

О всеблаженнии угодницы Божии, вси святии, приявшии наследие благ вечных! Приимите сие наше хвалебное пение, и благоприятными вашими к Богу молитвами испросите нам грехов оставление и вечных мук избавление, да с вами в небесном нашем Отечестве поем Богу: Аллилуиа.

**(Этот кондак читается трижды, затем икос 1 и кондак 1)**